

Den Uffwond mache merr

Omm letzde Somsdaachmoie hott misch de Schorsch oogerufe unn hott gefroochd: Gude Honnes, willsde aach widder mol mett doim ahle Kummbeer Schorsch babbele?

Isch war gons baff. Gude Schorsch. Awwer was sollen dess, widder medder babbele?

Doo seet de Schorsch: Ei weilde die letzd Zeit allsfort meddem Hubert telefoniern dust habb isch geglaabd, du deetst misch vergesse.

Isch habb ze Antwort gewwe: Du Schleeschdschwätzer, isch habb disch jedes Mol oogerufe unn habb dir verzähld, vunn was de Hubert unn ischs hadde.

Ei joo, moont doo de Schorsch, dess stimmt. Unn de Hubert dut aach e bissi mieh vunn der gonse Corona-Sach wisse als wie isch.

Isch frooch: Du willst disch doch nitt nor beschwern, odder?

De Schorsch druff: Naa, Honnes, isch wollt wisse wassde su mache dust in dene Zeide, wo de omm bessde dehoom bleiwe dust.

Isch habb ins Telefon gegrinst. Isch habbderr joo verzähld, dass de Hubert gesaad hott, er deet hauptsächlich uffroome unn isch gesaad habb, dess mach isch aach. Unn isch nemm oo, bei dir werrds nitt onnersders soi, odder?

Uffroome unn ahle Fotios sordiern, seet de Schorsch, awwer was mächsden außer uffroome?

Isch saach: Ja, Schorsch, doo duts aach noch e bissi ebbes onnersders gewwe. Du host doch e Patienteverfügung, gelle?

Ei ja, gibt de Schorsch ze Antwort

Doo saach isch: Zu unserne will isch jetz ferr misch unn die Fraa e Korrektur mache. Weil normalerweise will merr joo koo lebenserhaltende Maßnohme hawwe, wie künstlich Beatmung odder su. Awwer jetzt kennts joo soi, dassde weesche dem Virus ins Kronkehaus musst unn die Dokdern kenne disch nor mett su ooner Beatmung nitt nor omm Lewe halle, naa, aach widder gesund mache. Dess wolle merr in die Verfügung noch enoi schreiwe.

De Schorsch hott enn Aacheblig iwverleesched. Unn was willsde doo schreiwe?

Isch druff: Isch habb misch emol schlaue gemacht unn de noochfolgende Satz im Internet gefunne, isch les derrn vor: „*Wenn ich verhindern möchte, dass meine Patienteverfügung dahingehend missverstanden wird, dass ich im Falle einer Covid-19-Erkrankung eine Beatmung ablehne, dann sollte ich in der Patientenverfügung vermerken, dass die Ablehnung der Beatmung nicht für diesen Fall gilt.*“

Doo moont de Schorsch: Ach Honnes, mir sinn doch finfunnachtsisch, solle mir donn su ebbes iwverhaupt noch mache? Doo werrd monscher junge Mensch saache, wassen Uffwond ferr su Alde.

Isch bin gons ernst worrn. Den Uffwond mache merr. Weil, lieber Schorsch, du meddem Kättche unn isch mett de Fraa sinn noch sesomme, mir hawwe Kinner unn Enkel, sinn noch einischermaße gesund unn wolle noch e bissi bleiwe. Unn wenn mir Alde noch e gons Zeitlong dehoom bleiwe, kennt uns eischendlich nix bassiern. Unn wenn doch, donn wärs gut mett so ooner geännerde Verfügung.

Isch werrn emol mett moim Dokder redde, seet de Schorsch.

Mach dess, saach isch, isch werr aach versuche, moiner ze erreiche.

Eiern Honnes